

Augsburg, 15. Februar 1573

An Theodor Zwinger

UB Basel, Fr. Gr. I 11, fol. 344r.

S. Amicè tu quidem mihi ocium à typographijs gratularis: quod ut consequerer, te autore, non minima ex parte effectum est. Sed vide quam sim ἄνθρωπος ἀθλιος φύσει; Ne ocio illo ad philosophandum utar: τὰ δυσουρικὰ πάθη me iam ferè trimestre saeuissimè exagitant: et nunc, tempestate parum commoda, Thermas Ferinas in Hercyniae syluae barathro sitas, adire cogunt. Weitmoseri utinam in officio erga te sint: et spero futuros, siquidem sibi exigui temporis moram concedi postularunt. Fortasse te munere eximio exquisiti artificij ornare decreuerunt. Tu verò, γνησίως καὶ πρακτικῶς φίλοσοφῶν, rectè facis, qui in officij conscientia acquiescas: nec alienam culpam tibi dolendam censeas. Equidem et ante editionem me ad te scripsisse memini, rumorem esse, torrentem illis magnum dedisse damnum: et non ita pridem è quodam illorum populari audiui, eos parum propicio Plutone μεταλλεύειν. Sed utcunque sit, illa incommoda tanta non esse reor, ut illis de summa multum decedat, eoū redigat, ut ultrò datae ac delatae fidei obliuiscantur. Quod differtur, non aufertur. Volumen tuum Ethicum bene fortunet Deus. Me nisi desperatio vitae longioris, et imbecillitas valetudinis ad vendendam bibliothecam meam impulissent: et ipse fortasse in omnib[us] ferè graecis autoribus antiquis, quos pellegi, notatas, excerpissem. Nunc ingrato ocio fruor: et est sanè impeditum illud negocium, et penè infinitum, καὶ μυριάκις ταῦτὸν. Sed fortasse remedium hoc adhiberi potuisset, ut sententia à vetustiore autore posita, à recentiore repetita, non inculcaretur, nisi peculiaris verborum elegantia inuitaret, aut ipsa collatio iuuaret. Tu verò pro solertia ingenij tui facilè cauebis ne superuacaneis oneretur potius, quam ornetur opus futurum utique eximum, et plausibile. De Neandro idem quod tu vereor: cum ante complures annos ad Oporinum nostrum scripserit, se papyraceum esse hominem. Quot autem ferreos interea mors sustulit? Te verò Deus Opt[imus] Maximus reipublicae literariae quam diutissimè incolumen et florentem conseruet. Vale. Augustae Vindelicorum 15 Cal[endas] Martij Anno 1573.

Hieronymus Wolfius
Tuus.